

**Мѣсяца Іюля въ 8 день.**

**Повесть и чудеса Пречистые Богородицы, честнаго и славнаго Ея явленія  
образа, иже въ Казани.**

**Списано смиреннымъ Ермогеномъ, митрополитомъ Казаньскимъ.  
Благослови, отче.**

---

**А**ще убо и предивно чудо содѣяся в роде нашемъ милостивнымъ посѣтомъ Творца благому всему, Господа нашего и Бога Ісуса Христа, и рождшей Его Пресвятыя и Преблагословенныя Владычицы нашея Богородицы и Приснодѣвныя Марія пречюдною и чудотворною иконою въ преславномъ градѣ Казани: но како возмогу, недостойнѣ сый и недостойне устнѣ имѣя, провѣщати такая?

**Н**о обаче, надѣяся на неизреченныя щедроты Сына Божия и Того Рождшия молитвы, вселенныя учителя глаголь восприиму: *благословенъ Богъ и Отець Господа нашего Ісуса Христа, Отець щедротамъ и Богъ всякия утѣхи, утѣшаяя насъ о всякой скорби нашей и благословивый насъ благословеніемъ духовнымъ.* Преже убо праведный гнѣвъ свой, безаконія ради нашего, вмале испусти на насъ, оцыщая многія грѣхи наша: и въ мало дней оскорбихомся. Потомъ же, благодати ради Божия, скорбная забыхомъ неизреченнаго ради челоуѣколюбія Божия на насъ, и радости несказанней сподобихомся, явленія ради иконы Божия Матери и Тоя Превѣчнаго Младенца Господа нашего Ісуса Христа. Повсюду убо протекоша, яко громъ, во вся конца россіискія земля Божіе к намъ милостивное посѣщение — Богородицины иконы явленіе и неизреченныя чудеса, ихъже подаетъ неоскуднѣ с вѣрою приходящимъ. Мнѣ же, недостойному, самовидцу бывшу, како или коими чудесными благодотвореніи яви Богъ и Богородица от земныхъ нѣдръ чудотворный Свой образъ (яко же преди простретися слово хочеть), писанію ж предати замедлившу или отъ недостатка разума, или отъ нерадѣнія и душегубительныя лѣности, ово же и страха ради недостойнства: пленицами бо моихъ грѣховъ стягнуть есмь и таковымъ преславнымъ вѣщемъ нелѣпо ми бѣ коснутися, но развѣ точію безаконія моя знати и просити отпущенія безчисленнымъ моимъ согрѣшеніемъ. Но понеже желаніе привлечь мя и страхъ глаголати нудит мя, грѣси же мои, *яко бремя тяжко, отяготѣша на мнѣ:* и что убо сотворю? дерзну ли к начинанію? что убо? реку ли или запрещу себѣ окаянства ради моего? или паки внимаю восходящая на сердце мое блаженствомъ о Всепѣтей, и Богоприятней Богородицы и Приснодѣвѣй Маріи? Но Ты Сама содѣйствуй ми, о Преблагословенная, Заступнице Усердная, Мати Бога Вышняго, яко да воля иже ис Тебе рождшагося Христа Бога нашего будетъ: да ми, недостойному, помрачивыйся умъ мой тобою, о Всенепорочная, просвѣтитя (ты бо за всѣхъ молиши сына своего, Христа Бога нашего) и пишущу ми содѣйствуй: всѣмъ бо твориши спастися, в державный Ти покровъ прибѣгающимъ. Множицею бо воспоманухъ, нѣкогда же и слезы испустихъ, вѣдый мое недостойнство. Но обаче и се ми во умъ прииде, яко неправедно есть Божіихъ таинъ и неизреченныхъ к намъ и многомилостивныхъ дорованіихъ в забвенія глубине погружати, имже многимъ источникомъ целебнымъ и самовидецъ быхъ: и, елико видѣхъ и слышахъ о пречюдней Ти иконе, подай ми, о Всепѣтая, глаголати и писати, и всѣхъ насъ заступи, Госпожа Царице. Аще по достоянію и нѣсмь достоинъ похвалы Тебѣ принести, малы нѣкія отъ великихъ; но обаче сподоби мя, о Владычице, о Твоихъ неизреченныхъ на насъ благодѣянихъ хвалу Тебѣ принести; и яко же сподобила мя еси, о Всеблаженная, недостойнаго и грѣшнаго, скверными моими руками преже всѣхъ священныхъ прикоснутися пречистому Твоему образу и чудотворнай иконе и Сына Твоего Христа Бога нашего. Аще бо и вси достойни, но аз недостойнѣ сый: но обаче влекомъ жадаю, да поне прикоснуся пречистому Твоему и чудотворному образу, Владычице, и Превѣчнаго Ти младенца Спаса Христа.

**Н**ынѣ же паки что реку или что возглаголю великоименитей Дѣвѣй, паче же рещи многоименитей, пророки прореченнѣй? Пять убо к десяти мѣсяцемъ преидоша явленію чудотворныя Богородицины иконы, чудесная же исцеленія безпрестани неоскудно бывають, и вся

страсти душевныя и недуги телесныя немедленно от человекъ отгоними бывають. Сие паки призываетъ мя к торжеству и глаголати понуждаетъ: и яко подобаетъ ми и писанию сия предати, да не буду осуженъ, якоже и скрывый талантъ господина своего. Понеже убо человекъский родъ обыче и святыхъ памяти духовные с похвалами празновати, а иже Пресвятѣй и Преславней Царице царски празники празновати, Пречистыя Богородицы и Приснодѣвы Марія, — сию попремногу паче онѣхъ любовию почитати должны есмы (Та бо есть божественый покровъ рабомъ своимъ), и притецати к тихому сему и доброму Пристанищу, скорой Помощнице, готовому и теплomu Спасению, Покрову Дѣвыя; и яко Вышшей і паче всѣхъ тварей вышшую похвалу принести, яко Царице и Владычице царя и Владыку всѣхъ рождышую: Тоя бо ради праматерняя клятва потребися и Адамъ отъ вѣчныхъ уз свободися, и Богъ к намъ примирился. Тогда бо Иаковля лѣствица утвердися. Богу хотящу по ней снити и человекомъ путь сотворити къ небеснымъ и человекы со ангелы во едино быша: не ктому, яко же тогда, со Иаковомъ древле борется, ибо Творецъ Иаковль на землю сниде, погибшую драхму взискати хотя и Отцу принести. Тѣмже пророцы тогда возрадовашася, своему пророчеству збытіе зряще. Тогда убо Давыдъ, видѣвъ отъ сѣмени его правнуку родившуся, брячая в гусли, играя духомъ, глаголя: *слыши, дщи, и виждь, и приклони ухо твое.* Тѣмже тогда не токмо пророцы, но и превышняя и земная тварь съпразноваше. Нынѣ же паки приспѣ новый празникъ честный Владычицы нашея Богородицы честнаго Ея образа иконы Одигитрия, крѣпкия помощница: да познають вси, яко не токмо, егда въ мирѣ бѣше, ходатайственное къ своему Творцу и Сыну показоваше, но и паче, и по преславномъ своемъ преставлении отъ земныхъ въ небесная, непрестанно милостивно насъ присѣщая. Тѣмже, оставльше начало словеси, на совершение ведемся шествующе. Да коснемся иже о сихъ бесѣде, елико подастъ Святыи Духъ, преже похваливше ваше усердие теплое. Толико бо к церкви ваше тщание, паче-же к чудотворней Богородицынай иконе вѣра и моление, елико чадомъ к матери, елико жаждающему ко источнику, елико кораблю къ пристанищу. Толико и насъ веселить преспѣяние ваше, яко нынѣ явити намъ о семъ. Грѣхъ ради нашихъ Богъ наказуя насъ и наводя на насъ милостивнѣ праведный гнѣвъ свой, овогда гладомъ, овогда нашествиемъ иноплемennыхъ, иногда моромъ и межусобными бранми, овогда пожаромъ и прочими напастыми жития, и беды и тесноты и недуги люты наводя на насъ, — понужаетъ же паче ленивыя и жестокия на благая и подобная и спасенныя пути. Се убо реченное пророкомъ Давыдомъ къ Господу: *бродами и уздоу челюсти ихъ востягнеши, не приближающимся к Тебѣ многи раны.* І во иномъ псалмѣ глаголетъ: *аще оставятъ законъ Мой и в судбахъ Моихъ не пойдутъ, аще оправдания Моя осквернятъ и заповѣди Моя не сохранятъ, постыцу жезломъ беззакония ихъ и ранами неправды ихъ, милость же Мою не разорю отъ нихъ.* Апостоль: *его-же любитъ Господь, того и наказуетъ, бьетъ бо всякаго сына, его же приемлетъ; аще безъ наказания, преблудодѣйчища есте, а не сынове.* Понеже зловодими есмы человекы и неудобно шествие имамы к добродѣтели, и мало о спасении душъ нашихъ печемся, попускаетъ Владыка нашъ Господь напастми и бѣдами, и скорбми и недуги лютыми. Даже къ Нему обращаемся и о нашемъ спасении всеобразно печемся. Сия намъ содѣяшася праведнымъ судомъ Божиимъ.

**Бысть** же сиче. В лѣто 7087 [1579] при державѣ благочестиваго и христоролюбиваго, благовѣрнаго Государя Царя и великаго князя Ивана Васильевича всея Руси Самодержца, и при его благородныхъ царевичехъ — князе Иване Ивановиче и князе Ѳеодоре Ивановиче (нынѣ же Божию благодатию Государь, Царь и Самодержецъ всея Руси), и при святѣйшемъ митрополите Антонии Московскомъ и всея Руси, и при архиепископе Казанскомъ Иеремѣе, мѣсяца Іюня 28 день, на память святыхъ мученицы Агриппны, бысть пожаръ в новопросвѣщенномъ граде Казани, по взятыи града в двадесят шестое лѣто, яко достовѣрнейши сами видѣхомъ. Загорѣся в полуденное время близъ церкви святаго Николы, иже зовется Тульскій, во дворѣ нѣкоего воина царева Данила Онучина. И мала нѣкая часть посаду остана, и половина града к соборней церкви и дворъ архиепископлъ остана. Большая же часть посада: и торги всѣ, и во граде обитель боголѣпнаго Преображения Спасова, и дворъ великаго князя — увы! вся огонь всеядец пояде и пожже и без вѣсти сотвори. Людие же христоролюбивии вѣрою не отпадше, но познаша своя согрѣшения, на покаяние обратишася и начаша созидати церкви Божия и своя дома: и Божию милостию мѣсто убо иноязычно и новопросвѣщено просвѣщашася святыми церквами и Божественными учении. Языцы же невѣрнии мнози бяху во граде и вѣры многи. И бысть имъ в притчу и в поругание истинная православная вѣра, источника же целебнаго не бѣ тогда во граде. Иноязычнии же, невѣриемъ одержими въ сердцыхъ своихъ, уничижаху насъ, не вѣдяще Божия милости и силы: видѣша бо

окаяннии Божие милоседрие къ намъ, еже с милостию наказание; еже милуяй насъ наказуя, яко отецъ чадолубивъ, за наша согрѣшения, оцыщая грѣхи наша. Человѣколюбець же Богъ, видя терпѣние людей своихъ и вѣру ихъ, и поругание, и поношение окрестъ живущихъ иновѣрныхъ, и не терпя поношения и похуления на святыя иконы и да не рекутъ языцы: гдѣ есть Богъ ихъ, в него же вѣрують? Да заградятся уста, иже глаголють неправду и дабы убо исчезло и не помянулось жидовское и безсерменское суровство и тщегласное хуление ихъ, и дабы искоренилось злоплевельное еретическое учение, и утвердилась бы и просвѣтилась православная вѣра истинная христьянская. греческаго закона, правымъ учениемъ Господа нашего Исуса Христа и святыхъ его ученикъ и апостолъ и богоносныхъ отецъ и всѣхъ святыхъ, утвердившихъ православную вѣру Христову и научившихъ вѣровати «во Отца и Сына и Святаго Духа», нераздѣлимую Троицу. Предстательствомъ убо и молениемъ Заступницы наша Царицы Владычицы Богородицы и Приснодѣвы Марія, еже къ Сыну Своему и Богу нашему приснымъ предстояниемъ, нынѣ же ради благодати Божия в сие в послѣднее время показа намъ праведное и всесвѣтлое солнце, и отверзе породу Едема затвореннаго, и яви отъ земли пресвѣтлую икону, источникъ неизчерпаемый, Своимъ человѣколюбнымъ смотрениемъ в земли сокрыему чудотворную икону Матери Своея, а наша Царицы, Владычицы Богородицы и Приснодѣвы Марія честнаго ея Одегитрия, и Свой человѣколюбный образъ. Отнюду же убо праведный гнѣвъ Свой за наше согрѣшение испусти, оттуду близъ мѣста того, яко камени вержениемъ, и благодатию свѣтящую лучю и исцеления источникъ показа. Яви убо себе Богородицына икона сицевымъ образомъ. Не яви убо образа своего Владычица ни святителю града, ни начальнику властелинску, ниже вельможи или богату, ниже мудру старцу: но яви свое честное сокровище, источникъ неизчерпаемый приходящимъ с вѣрою, чудный свой образъ, нѣкоего мужа от простыхъ, имуща мудрость на войнѣ стрелебную, сего дщи юнна, десяти лѣтъ суца, именовъ Матрона. Сей бо дѣвицы явися чудная она и пресвѣтлая икона Богородицына. И после убо пожара в томъ же лѣте и месяце, сице нача являтися дѣвицы оной, ей же имя преди рекохомъ, икона пресвѣтлая Божия Матери. И веляше ей поити во градъ и повѣдати про икону Богородицыну, ея же видѣ, архиепископу и воеводамъ, дабы шед выняли образъ Пречистые Богородицы от земельныхъ нѣдръ: и мѣсто повѣда ей, идѣже последи обрѣтоша драгаго бисера честное сокровище, чудную икону Богородицыну. Дѣвица же убо, юна и немислена, боящися повѣдати: и абие едва повѣда матери своей, мати же глаголы ея ни во что же вмѣнивъ. И послѣди же убо въ видѣнии не единою являшися ей пресвѣтлая и чудная она икона и веляше ей безъ сумнѣния сие видѣние повѣдати. Девица же не единою, но и многжды, сказоваше матери своей явление чудныя тоя божественныя иконы: веляше ей безъ сумнѣния повѣдати сие видѣние. Во единъ же убо день случися дѣвицы оной, ей же имя выше надписахомъ, спати в полудне: и внезапно дѣвица обрѣтешя посреди двора своего, в немъ же живяше, и абие явися ей чудная и пресвѣтлая Богородицына икона страшнымъ огненнымъ образомъ, лучи испущая огнены, пресвѣтлы и страшны зѣло, яко мнѣтися ей от пресвѣтлыхъ тѣхъ лучъ, сияющихъ от иконы, сожжене быти. И гласъ бысть отъ образа страшень, къ дѣвице глаголющъ: «аще убо не повѣси глаголъ Моихъ и не пойдеши от земельныхъ нѣдръ вынати образа Моего, Азъ же убо имамъ во иной улицы явитися и во иномъ граде, ты же имаши болѣзнена быти, дондеже и живота злѣ гонзнеши». Дѣвица же, от страшнаго сего видѣния зѣло ужасшися, паде на землю и бысть яко мертва, и лежаше на земли на многъ часъ. И абие возопи велиимъ гласомъ к матери своей, дабы шедъ повѣдала архиепископу и правителемъ града того о чудней и пресвѣтлей иконе Препоблагословенныя Владычицы наша Богородицы и Приснодѣвѣй Марии; и повѣда ей вся глаголы реченныя, яже слыша отъ пресвѣтлыя иконы, и мѣсто указуя. Мати же ея скоро иде во градъ к воеводамъ, и дѣвицу предъ ними представи; повеле ей, да сама глаголетъ, яже о ней содѣянна. Дѣвица же повѣда имъ вся глаголы реченныя, яже слыша от причюдныя и великолѣпныя Богородицыны иконы, и мѣсто указуя. Они же убо, невѣриемъ одержими о пречестней Пречистыя иконе, о ней же девица повѣда, и ни во что же вмѣниша. Мати же прослезився, вземъ дщерь, иде къ архиепископу, тѣ же предиреченныя повѣда глаголы и мѣсто указанное ей сказуя: дабы повелѣлъ вынати святую Богородицыну икону. Архиепископъ же не внять рѣчемъ ея и отосла ю бездѣлну: бѣ же приходъ ихъ въ седмый часъ дне, обрѣтоша же чудный онъ пресвѣтлый образъ Богородицынъ въ часъ вторый на десять, по пожаре на томъ же лѣте, мѣсяца Июля въ 8 день, на память святаго великомученика Прокопия. Бысть же сице. Пойде убо жена та к дому своему, повѣдая всѣмъ людемъ о чудней иконе: како видѣние видѣ дщи ея. Людие же, дивящися о глаголахъ ея и отхождаху не внимающе речемъ ихъ. Она же, вземъ заступъ и пришедъ к показанному мѣсту, нача копати много время, и не обрѣте искомаго. Помале же убо начаша инии

копати: и все уже мѣсто воскопаше, ничто же обрѣтше. Предиреченная же она дѣвица нача копати на мѣстѣ, идѣ же пещь бѣ; таже и прочии съ нею. И яко выкопаша мало боле двою лактей — оле чудо! явися чудотворная икона Владычицы нашаия Богородицы и Приснодѣвы Мариа, честнаго ея Одигитриа, купно с превѣчнымъ младенцемъ, Господемъ и Богомъ нашимъ Исусомъ Христомъ. На чудной же той иконе бѣ рукавъ однорядки сукна вишнева ветхъ; самый же чудотворный образъ свѣтлостію чудне сияя, якоже внове вапы начертанъ. Земному же праху никако же коснувшуся чудному тому образу, яко-же сами видѣхомъ. Девица же, вземъ Пречистые образъ со страхомъ и трепетомъ и радостію, и поставиша на томъ же мѣсте. Людие же ту сущии возопиша, проповѣдающе немолчными гласы явление божественныя тоя иконы. И вскорѣ стекошася безчисленное множество благочестивыхъ народа, вопиюще со слезами: «Владычице, спаси ны!» И послаша вѣсть ко архиепископу и к первымъ града, яко обрѣтоша Богородицынъ святыи образъ. Архиепископъ же повелѣ скоро в колоколь звонити. И поиде со кресты на мѣсто то со всѣмъ освященнымъ соборомъ, идѣже обрѣтоша чудную Пречистые икону, с воеводы и со множествомъ народа. И видѣ Пречистые образъ: яко-же новъ даръ пречюдне свѣтяшеся, и дивися убо зело, яко такова переводомъ образа не видѣша нигдѣ же, и недоумѣвашеся. Страхомъ убо и радостію одержими, невѣрия ради своего, с плачемъ моляся и милости прося, и прощения о согрѣшении. Сиче же и воеводы с плачемъ просяще милости, еже согрѣшиша к чудотворному Пречистые образу, нерадѣниемъ и невѣриемъ. И весь народъ града стекашеся, на дивное то божественное чудо веселящеся, со слезами и радостною душею хвалу Богу и Богородицы, о обрѣтении многобогатаго и безцѣннаго сокровища возсылаху. Мнѣ же тогда в чину поповсте святаго Николы, иже зовется Гостинь, каменосердечень же сый: но обаче прослезихся и припадохъ к Богородицыну образу, и к чудотворней иконѣ и к превѣчному младенцу Спасу Христу, и потомъ поклонихся архиепископу, и благословение испросихъ о еже бы повелѣлъ взяти ми пречюдную Богородицыну икону; архиепископъ же благослови мя и повелѣ взяти ми. Азь же, аще и недостойнъ сый, но обаче со страхомъ и радостію прикоснухся чудотворному тому образу: и взяхъ з древца, иже бѣ поткнено на томъ мѣсте, идѣже въ земли бѣ святая та и чудная икона. И по повелѣнію архиепископа, с прочими святыми иконами и честными кресты, идохъ со иконою въ близъ сущую ту церковь святаго Николы, иже зовется Тулский: и тамо, молебному пѣнію совершившуся, и паки архиепископъ со всѣмъ освященнымъ соборомъ, и первии града, и все множество православныхъ народа, со женами вкупѣ и детми, вслѣдъ святыхъ иконъ во градъ идуши. К новоявленной же чудотворней иконе безчисленное множество народа рѣяхуся, и другъ друга попирающе, инии же по главамъ инѣхъ ходяще, к чудотворному образу тѣмны прикасахуся. Мнѣ же, по повелѣнію архиепископа, народа ради съ чудотворною иконою медленно идущо, но обаче толикое множество народа не соврати мя ни на десно, ни на шуе: несох бо носящаго всю тварь, и того рождешей пречюдную и чудотворную икону. И въ той часъ Пречистые Богородицы образъ показа чудо.

### **Чудо 1-е.**

**Ч**еловѣка просителя, именовемъ Иосифа, не видѣвша очима ни мало, яко самъ повѣда, три лѣта, — прозрѣти того Владычица сподоби. Враг же, не навидяи спасения человѣкомъ, забыти тому сотвори вскоре богатаго Врача, подавшего исцеления, Пречистую Богородицу. Еже бы воздати молитву и благодарения, вмѣсто того на прошение сребра паки устремися, ему же извыче: и вѣрою отпаде и лѣнностію отягченъ, не получи до конца спасения. и невѣдѣния ради своего малу стезю зряше. Народи же, видѣвши чудо, и болшую вѣру ко образу Пречистыя приложиша. И тако Пречистыя образъ, чудотворную икону, внесоша въ соборную церковь Пресвятыя Богородицы честнаго и славнаго ея Благовѣщения. И ту в соборной церкви Владычица показа чудо второе.

### **Чудо 2-е.**

**Ч**еловѣка нѣкоего, именовемъ Никиту, не видѣвша очима ни мало свѣта, прозрѣти того Богородица сподоби. Онъ же убо теплою вѣрою припаде къ чудотворному Ея образу и получи здравие, хваля и славя Бога и Пречистую Богородицу. И тако, пѣвше молебная пѣнія, абие отидоша въ дома своя со страхомъ и трепетомъ и радостію мною. На утрие же архиепископъ служивъ божественную литоргию; народи же вси, приходяще въ соборную церковь к чудотворному образу и дароношение приносяще: инъ злато, инъ же сребро, и кто что можаше, кийждо по силѣ. Пречистая

же Богородица нача являти чудеса своя. Преже реченную же дѣвицу Матрену с материю ея почтоша архиепископъ же и воеводы и весь народъ. Чюдную же икону списавше и преславное явление чудотворная тоя иконы, и чудеса, бываемыя отъ нея, написаша и послаша въ царствующий градъ на Москву к самодержавному царю Государю и великому Князю Ивану Васильевичю, всея Руси Самодержцу, и к сынома его — царевичю князю Ивану Ивановичю и царевичю князю Ѳеодору Ивановичю, нынѣ же Божию благодатию Государь Царь и Великий Князь, Самодержецъ всея Руси. И видѣша убо христоролюбивии царие чюдную икону Владычицы нашея Богородицы и Приснодѣвѣй Марии и честнаго ея Одегитрия и дивишася зело: яко такова образа переводомъ нигдѣ же не видѣша. Благовѣрный же Царь Государь и Великий Князь и сынове его повелѣша на томъ мѣсте церковь поставити, идѣже обретется чюдотворная икона, и монастырь дѣвѣ повелѣ устроити, и кѣлии поставити и ограду монастырю оградити, и милостыню доволну повелѣ дати изъ своей царские казны: священному собору и игуменье, и 40 сестрамъ урокъ лѣтний, еже и бысть. И церковь поставиша во имя святыя Богородицы честнаго ея Одегитрия деревяну, и ограду монастырю сотвориша. Честную же ону и чюдотворную икону Пресвятыя Богородицы отнесоша в монастырь съ молебнымъ пѣниемъ со кресты: архиепискупъ и бояре со всѣмъ народомъ проводиша честно. Предиреченную же дѣвицу Матрену постригоша въ томъ же монастыри: и наречено бысть имя ей Мавра во инокихъ, не по мнозе же времени пострижеся и мати тоя дѣвицы. Поставиша же и другую церковь теплую с трапезою во имя Рождества Пречистыя Богородица. И абие нача являти Богородица чудеса Своя.

### **Чюдо 3-е.**

**Ч**еловѣкъ нѣкто из Вияжскаго града лютѣ болѣзнию одержимъ бѣ и приведенъ бысть к пречистому и чюдотворному образу женою своею, и моляшеся с теплою вѣрою Богородицы и не отпаде прошения своего: получи здравие и отыде въ домъ свой радуся.

### **Чюдо 4-е.**

**Н**ѣкогда убо отроча материею своею принесено въ церковь, слѣпо очима; мати же его стояше предъ образомъ Богородицы, с плачемъ моляшеся о прозрѣнии отрачате. Отроча же внезапно нача руками осязати по лицу матеръ свою. Народи же убо вси молишеся Пречистыя образу; архиепископъ же стояше на мѣсте своемъ, зряше на отроча и видѣ сие, яко отроча матеръ свою рукама осязаше. И повелѣ принести яблоко красно и показати отротати. Отроча же и яблоко нача хватати: и вси истину увидѣвше, яко прозрѣ отроча; и славу воздаша Христу Богу и Пречистой Его Матери Владычицы нашея Богородицы, творяще дивная чудеса.

### **Чюдо 5-е.**

**Н**ѣкто сынъ боярской, именовемъ Ивашка тако нарицаемъ, прослутиемъ же Кузминской; у него же бѣ жена болна ногами: не можаше ими ни мало двигнути. Болѣзнь бо велми одержаше ю и ничимъ же себѣ не можаше помощи, но паче труднее бываше. И абие повелѣ себѣ принести к чюдотворному образу Пречистой Богородицы и, молебная отпѣвъ, со многою вѣрою и со слезами моляшеся, милости прося: и абие получи здравие, и отойде в домъ свой радуся.

### **Чюдо 6-е.**

**Б**ысть же убо, в веси сына боярскаго Василия Рагозина, нѣкоего поселянина женѣ явися святая Богородица и веляше ити ей пречистому образу, иже есть в Казани, и повѣдати мужу своему, дабы шедъ молился чюдотворному образу. Она же не внять рѣчемъ Ея и мужу не сказа. Явижеся убо и второе сама Владычице: и абие нѣкая божественная сила взять руку ея и удари ю по лицу ея и бысть рука ея суха. Жена же прииде во градъ и повѣда все по ряду архіепископу случшася ей: и прииде к чюдотворному образу, и получи здравие. И абие утвердися рука ея, якоже и другая. и отиде въ домъ свой радуся.

### **Чюдо 7-е.**

**Ч**еловѣкъ нѣкто въ градѣ Казани, именовъ Исакъ, прорекломъ быкъ, нѣкоторыя вдовы сынъ, именовъ Улиты, вѣрны сущей, боящейся Бога, на посаде проскурни верховныхъ апостомъ Петра и Павла. И бысть в раслабленіи полтретия годы; болѣзнь же его бѣ всѣмъ знаема, живущимъ окрестъ: не можаше велми ногами и до полу. И посла мать свою к чудотворному образу Пречистыя Богородицы молебная пѣти. Самъ же убо в дому своемъ на одрѣ лежаще и начатъ со слезами предо образомъ плакати и молитися Пресвяте Богородицы, дабы ему самому видети чудотворный Богородицынъ образъ. И в томъ часѣ видѣ себѣ мало легчайши отъ болѣзни: и абие милостию Пречистыя Богородицы воставъ о собѣ на ногахъ и начатъ по малу поступати и, вземъ два посоха и абие подпираяся ими, поиде въ монастырь к чудотворному всемилостивому Богородицы образу. О великихъ Ти чудесь, Богородице! матери со слезами о сыну молящися, сынъ же ненадежно и самъ в монастырь прииде: мати же его видѣ и изумися, и едва во умъ прииде, и нечаемое извѣстно увѣде. И приложиша к слезамъ слезы, молящися Богородицы о исцелении: и тако до конца получи здравие. И воздаша хвалу и славу Господу Богу и Пречисте Богородицы, мѣсяца Апрѣля въ 30 день отойдоша во свой домъ, хваляще и славяще Бога, творящего дивная и преславная чудеса.

### **Чюдо 8-е.**

**Ж**ена нѣкоего пришелца, Полоцкаго попа Григория. живяше в селѣ в Тагашевѣ (такъ бо звашеся мѣсто то), именовъ Елена. Бысть же болна очима три лѣта и абие убо отъ многия тоя болѣзни и зракъ отъяся, якоже уже не видѣти ей ни мало. И услыша убо многая и преславная чудеса отъ иконы Пречистыя Богородицы во градѣ Казани, и поиде во градъ к чудотворному образу милости просити. И еще убо ей недошедши града Казани яко седми поприщъ, и абие внезапно узрѣ свѣтъ очима и мнѣтися ей, яко николиже ими болна бѣ: и пришедъ в монастырь к чудотворному образу, хвалу воздаде Господу Богу и Причистой Богородицы.

### **Чюдо 9-е.**

**П**овѣда намъ инокъ Иосиѣвъ, иже нынѣ погребный ключникъ в дому Пречистыя (тогда же живя въ Троецкомъ монастырѣ, иже въ Казани): бысть, рече, болѣти ему очима, яко ни мала свѣта видѣти; и абие обѣщася молебная пѣти Пресвятѣй Богородицы. И егда приидоша священницы с чудотворнымъ Пречистыя образомъ, в день недѣльный, в соборную церковь Пресвятыя Богородица честнаго и славнаго Ея Благовѣщення, к молебну, Иосифъ же у чудотворнаго образа во время молебнаго пѣнія моляся прилежно. И не получи исцеления, и отиде скорбень. И абие возлеже отъ болѣзни: и сведень бысть в сонъ тонокъ, и видить икону Святыя Богородицы. И бысть ему отъ иконы гласъ, глаголющъ: «востани и поиди въ домъ Пречистыя, и отпой молебная, и утри лице свое пеленою и тако получиши исцеление». Онъ же, вставъ вскорѣ, и повелѣ себе вести в монастырь Пречистыя Богородицы. И отпѣвъ молебная и повелѣ себе покропити святою водою, и пеленою Пречистыя утерся. И въ той часъ отъ очию его отбѣже болѣзнь: и узрѣ свѣтъ, и воздасть славу Богу и Пречистой Богородицы.

### **Чюдо 10-е.**

**Н**ѣкто человекъ, именовъ Козма Окуловъ, Лаишескаво града, бысть во иступлении ума. Свои же ему совѣщаша итти в Казань к Пречистой Богородице в монастырь. Онъ же в себѣ бывъ и нача Пречистой Богородице о исцелении молитися: и помощию Пресвятыя Богородицы бысть ему облегчение, и прииде в монастырь и образъ Пречистыя сподобися видѣти по своему обѣщанию, якоже обѣщася. И молебная пѣвъ и абие получивъ совершенно исцеление, и бысть здоровъ и отиде в домъ свой, радуяся и славя Бога и Пречистую Богородицу.

### **Чюдо 11-е.**

**Ч**еловѣкъ нѣкто во граде Казани, именовъ Онтонъ, прорекломъ Кажеваръ; ему же жена, именовъ Пелагия, не видѣ очима яко дней 40. Слышевъ же многия и преславныя чудеса отъ Пречистыя Богородицы чудотворнаго Ея образа, и в день недѣльный иде в монастырь Пречистыя Богородицы. И многую вѣрою одержима бѣ, не погрѣши надежи, но получи исцеление. Егда убо

приидоша с чудотворною иконою Богородициною с соборнаго пѣния молебнаго священницы, жене же той случися срѣсти икону Пречистыя, сошедъ съ паперти церковныя: и абие въ той часъ прозрѣ, и отиде въ домъ свой, радующеса, хваля и славя Бога и Пречистую Богородицу.

### Чюдо 12-е.

**Ч**еловѣкъ нѣкий, именемъ Троѡимъ, Ларионовъ сынъ, Колмогорсково уѣзду, волости Листра острова, во граде Самаре впаде в болѣзнь и лютѣ трясавицею одержимъ; ктому-же на очи ему прииде тяжка болѣзнь. Онъ же, слышавъ Пречистыя Богородицы неизреченное милосердие, еже подаетъ отъ чудотворныя своя иконы неоскудное исцеление съ вѣрою молящимся ей, и нача молитися Пресвятѣй Богородицы о исцелении. И абие видить во снѣ икону Пречистыя Богородицы, стоящу в возгавии своемъ, и гласъ слышитъ отъ чудотворныя тоя иконы, именемъ его зовущъ: «иди, рече, во градъ Казань ко образу моему, и тамо исцеление получиши». Онъ же возбнувъ и почю в себѣ облегчение не мало отъ трясавицы; тако-же и очная болѣзнь не якоже исперва бѣ. И прииде во градъ Казань в монастырь Пречистыя Богородицы во время святыя литоргия, и нача пред образомъ Пречистыя неутѣшно плакати и с вѣрою молитися, глаголя: «даждь ми, о Владычице, еже ми еси обѣщала; не малъ бо путь трудихся милосердия Твоего ради». И абие вскорѣ исцеление получи отъ обою болѣзней: и очима прозрѣ, и тѣломъ здравъ бысть. И славя Бога и Пречистую Богородицу, повѣдая всѣмъ людямъ дивная и преславная отъ Пречистыя иконы милосердие ея и скорое свое исцеление.

### Чюдо 13-е.

**В**о граде Свияжскомъ попъ бѣ, ему-же имя Иванъ, церкви святаго великаго чудотворца Николы, иже зовется Жилецкой; ему-же жена, имя ей Домна. И по дѣйству дияволу, нѣкая сусѣда ея, или любви ради, или хотя надъ нею бѣду сотворити, в запойство упои ея, до токова зла. Идуши ей въ домъ свой, толикъ срамъ нанесе мужу своему и себѣ, яко и главоглаголю не обрѣтися на ней; людемъ же многимъ позоръ дѣюшимъ, инѣмъ же и скорбящимъ о таковѣй срамотѣ: понеже мужъ ея человѣкъ искусенъ бѣ и ненавидя пьянства, и злыхъ ошаяся, яко же и всѣмъ намъ знати его. Самого-же попа того не бѣ тогда во граде, но бѣ отлучился нѣкоего ради орудия. Жене же его на утрия і от сродникъ своихъ домашнихъ слышавше сотворившая ей напасть, впаде во отчадние и въ болѣзнь тяжку зѣло, ово страха ради, ово срама ради: и нача злымъ бѣсомъ одержима быти. И бѣ болѣзнь ея люта зѣло: на кийждо день и ночь до десятижды и вящи случашеса ей лютая та нестерпимая бѣда, зубы скрегча и пѣны теща, и составы членовныя трескотаху злѣ, якоже самъ попъ Иванъ повѣда намъ. И бѣ тако бѣднѣ стража до тридесяти пяти недѣль. Попъ же той Иванъ, безпрестани моля Бога и Пречистую Богородицу о исцелении жены своей и святыхъ угодникъ Божиихъ призывая в помощь, не единости же и в Казань к чудотворному образу Пречистыя Богородице привозя жену свою. И не получи ни мало отрады. Во сто же первомъ году, Феврала въ 7 день, паки привезе жену свою в монастырь къ Пречистѣй Богородицы: и начаша со многими слезами молити Бога о исцелении ея. Феврала жъ 11 день бысть гласъ во снѣ игуменьи монастыря Марье, дабы повелѣла бѣснующую к чудотворному образу прикладывати в то время, егда учнетъ бѣсъ томити ея. Игуменья же Марья вскоре повелѣ тому быти. И егда нача бѣсъ томити ея, и взявше бѣснующуюся, приложиша к чудотворному образу Пресвятыя Богородицы: и абие, въ той часъ, бысть недвижима отъ лютаго бѣса, и обрѣтеса здрава. И многу хвалу и благодарение воздаша Богу и Пречистой Богородице и идоша въ домъ свой, славяще Бога.

### Чюдо 14-е.

**В**о граде жъ Казани человѣкъ нѣкто, именемъ Дмитрей, прорекломъ Тоскутей, ремесствомъ скорнякъ; ему-же жена, имя ей Домна. Случися ей болѣзнь тяжка зѣло, рукама и ногама скорчившимся. И лютѣ болѣзни той притужающи ей, яко зрящимъ на ню умилнѣ плакати. Дщи же ея, именемъ Неонила, девица, тою же болѣзнию злѣ одержима: по всему убо яко и мати ея страдаше. И в болѣзни своей къ Пречистой Богородицы умилныя глаголы со слезами вопияху, о исцелении молящеса, простягши же ся имъ болѣзни той на мѣсячное. Дмитрей же, взявъ жену свою, и отвезе ю в монастырь в церковь Пресвятыя Владычицы нашия Богородицы, честнаго и чудотворнаго образа

явления. Жена же его нача со слезами и с воплемъ многимъ молитися Пречистой Богородице о исцелении, яко и незнающимъ ея рыдати и плакати. Дмитрей же отходитъ въ домъ свой, хотя и дщерь пояти къ Богородицыну чудотворному образу. И абие ненадежно радость обрѣте: пришедъ в домъ свой, и видѣ дщерь свою здраву и ничтоже отъ болѣзни страждущу. И благодаря Бога и Пречистую Богородицу, иде вскорѣ к женѣ — повѣдати ей изцеление дщери своея. Времени же тогда бывшу чтому на литоргии святому евангелию, въ самое же то святое благовѣстие, пременися отъ недуга и жена его: и бысть здрава, яко николиже болѣвъ. Оле чудо! во единъ часъ, по дѣйству дияволу, дщи и мати люту скорбь болѣзнену восприяша: во единъ же часъ отъ чудотворныя Богородицыни пречюдныя иконы и исцеление восприяша. Дмитрей же и вси людие видѣша предивное скорое, Пречистую Богородицею, жене своей и дщери отъ болѣзни пременение; сугубо воздаша Богу и Пречистой Богородицы благодарение. Вопрошаху же жены его: како имъ найде со дщерию равенство недуга і во едино время? она же исповѣда подробну: «бывши ей, рече, у нѣкоего сосѣда на обѣде, и по времени иде въ домъ свой, и найде на пути платъ малъ завязанъ, и подъемъ его, и принесе въ домъ свой; и развѣза платъ той — обрѣте в немъ едину сребреницу да два орѣха; и единъ орѣхъ сама снѣсть, другой же дщери вда: от того и пострадаша».

### Чудо 15-е.

**Ч**еловѣкъ нѣкто, именемъ Оѡнасей, Ероѡфевъ сынъ, Ярославецъ, в день недѣльный приведенъ бысть в соборную церковь Пречистыя Богородицы честнаго Ея Благовѣщения. И многими человекы едва одолѣвъ бысть внити в церковь: бѣ бо бѣснуяся и рѣся зѣло, и никако же взирая, и не глаголя ничто же. Тогда же бѣ, яко же обычай, и чудотворная Богородицына икона принесена въ соборную церковь: и поставиша его предъ мѣстнымъ образомъ Пречистыя Богородицы честнаго и славнаго Ея Благовѣщения и предъ чудотворною Богородицыною иконою. Онъ же никако же смотря, ниже глаголя. По отпѣтии же молебновъ, возьмъ святыя воды и покропихъ его: онъ же воззрѣвъ и нача по малу во умъ приходити. И видѣвъ образъ Пресвятыя Богородицы и рече: «Пречистая» и ту приложиша его къ Богородицыну чудотворному образу и къ прочимъ святымъ иконамъ. И по малѣ нача глаголати. Молебному же пѣнию совершившуся и чудотворней иконе въ монастырь пошедше, намъ же святую и чудотворную Богородицыну икону, яко же обычей, проводихомъ. Тому же Оѡнасию в соборную церковь возвратитися повелѣхомъ, божественныя ради литоргия. И егда начаша чести святое евангеліе, той же предиреченный Аѡнасие совершенно исцелѣ молитвами Пресвятыя Владычицы нашея Богородицы, юже приносить о всѣхъ насъ къ Сыну Своему, Христу Богу нашему. Намъ же, вопрошающимъ его о содѣянныхъ, яже о немъ: что и како исперва прилучися болѣзнь ему? онъ же повѣда: «видѣхъ, рече, въ нощи, яко приидоша многи толпы бѣсовъ и претяху ему мукою, и показующе ему мечты своими, яко бы взношаху его на высоту и низпущаху долѣ, и ина злая дѣюще ему. Болѣзнь же его бѣ двѣ седмицы. Милостию же Божию и молениемъ Пречистыя Богородица отиде въ домъ свой здравъ, радуяся и хваля Бога и Пречистую Богородицу.

### Чудо 16-е.

**С**ожительствуя же ми в кѣльи моей инокъ Арсеній, зовомый Высокий, иже послѣди бысть архимаритъ монастыря святаго Спасова Преображения. И прилучися ему болѣти ногою: болѣзнь же ту нарицаху камчюгъ, инии же инако зваху. Мы же тому неразумни суще, не вѣдаху имени болѣзни той; но обаче болѣзнь крѣпка зѣло, яко едва мощи ему мало ступати нужи ради и здоровою ногою: ис кѣлии же, кромѣ великия нужда, никако-же исходити ему, болѣзни тоя ради. В то же время и повелѣние отъ Самодержавнаго Государя Царя и Великого Князя Ѳеодора Ивановича всея Руси прииде къ намъ, по молению иноковъ монастыря боголѣпново Спасова Преображения, иже въ Казани, благословити и поставити предипомянутого Арсенья архимаритомъ. Тогда же поставити его не бѣ мочно, зѣлныя ради его болѣзни. Приспѣвшу же празнику Преполовения (въ онъ же день святая и апостольская церкви празнество повсюду прия исходити с литиею и молебная пѣния совершати), мнѣ же ис кѣлия въ церковь еще не изшедшу, съ чудотворною же Богородицыною иконою приидоша священіцы, якоже обычей. Предипомянутый же Арсеней во оконце смотря и со слезами Богородице о исцелении моляся. И внезапно нача с великимъ рыданиемъ плакати и благодарити Бога и Пречистую Богородицу, повѣдая своей болѣзни изцеление. Токмо, рече, гласъ испустихъ и прослезихся, Богородица же вскорѣ милосердіе Свое показа на мнѣ И той часъ иде ис

келия в соборную церковь самъ о себѣ. И пришедъ в церковь, пѣвъ молебень и благодарение воздая Богу и Пречистой Богородицы о исцелении своемъ.

**О**тъ образа же Пречистые Богородицы неисчетно многа исцеления подаваются приходящимъ с вѣрою. Но обаче доволно и по ряду хто возможетъ исписати Богородицыны чудеса? дерзнухъ бо написати от великихъ малая, ина же многа преминухъ: земли убо широта, и морю глубина, и Богородицына чудеса неизочтена. Сия же написахъ, яко да не забвению предана будутъ в послѣдняя времена.

**Б**лагочестивому же и Самодержавному Государю Царю и Великому Князю Ѳеодору Ивановичу всея Руси исперва, отнелъ же явися целебный источникъ — икона чудотворная Пресвятая Владычицы наша Богородицы, вся сия знаема суть. И вѣрою теплою и духомъ горя, яко же слышахъ отъ его царскихъ устъ ко мнѣ, рабу его и богомолцу, глаголемая въ то время, егда повелѣ мя Божиимъ изволениемъ устроить въ чинъ митрополита. Слышахомъ, рече, о милостивнемъ неизреченнемъ челоуколюбии Божии и Пречистыя Богородицы на насъ: како яви Богородица чудотворную и пречюдную свою икону в нашей отчѣнѣ Казани, простирая к намъ милость свою; и како подаетъ неизреченныя целбы съ вѣрою приходящимъ. И хошу, рече, недостаточная исполнити, еже и бысть. Повелениемъ его царскимъ, въ лѣта 7102 [1594] в недѣлю святыхъ женъ міроносицъ, Апрѣля 14 день, на память иже во святыхъ отца нашего Мартина папы Римскаго, заложенъ бысть храмъ предивенъ камень Пречистыя Владычицы наша Богородицы и Приснодѣвы Марія честнаго и славнаго Ея Одигитрія чудотворнаго образа явления, а в предѣле храмъ честнаго и славнаго Ея Успения; другой предѣль святаго благовѣрнаго великаго князя Александра Невскаго, во иноцехъ Алексія, новаго чудотворца. Священа же бысть святая та церковь и с придѣлы 7103 [1594] г. Октября 27 дня в недѣлю, на память святаго мученика Нестера, гдѣ Исусъ большой обложенъ сребромъ того же лѣта; и тѣми мѣстными иконами и книгами, и ризами, и прочими церковными потребами повелѣ Государь Благочестивый Царь и Великий Князь Ѳеодоръ Ивановичъ, всея Руси Самодержецъ, удоволити, еже и бысть. Самую же ту пречюдную и чудотворную Пречистыя Богородицы икону златомъ и каменiemъ драгимъ и жемчюгомъ великимъ предивне украси царскихъ сокровищъ хранитель Деменша Ивановичъ Черемисиновъ. Инокинь же старицъ въ монастырѣ 64. Хлѣбъ имъ и денги и прочая потребная из царские казны.

**М**ы же Божию благодатию и Пречистые Богородицы чудотворнымъ Ея образомъ хвалимся и веселимся и воспѣваемъ пѣснь побѣдную Сотворшему дивная чудеса, во Троицы славимому Богу, Отцу и Сыну и Святому Духу нынѣ и присно и во вѣки вѣкомъ. Аминь.

---

Печатается по изданію: Творенія святѣйшаго Гермогена, Патріарха Московскаго и всея Россіи. Съ приложеніемъ чина поставленія въ Патріарха. – Изданіе Церковной Комиссіи по чествованію юбилейныхъ событій 1612, 1613 и 1812 годовъ. – М.: Печатня А. И. Снегиревой, 1912. – с. 1-16.